

1 TESARONIKA

Jesus hã h'yy ka'eeh do panang Tesaronika häd näng doo
bã habong do hã pooj jé Paw-Ro ma erih do hahÿh.

1 ÿ Paw-Ro, Siras, Tsimoot daheeh, ãã edëng bëeh, Tesaronika panang bã habong doo, Jesus Kristo Tak'ëp Hyb N'aa Jawyk Do hã h'yy kata däk doo, P'op Hagä Do ër Yb hã h'yy kata däk doo. ãã karën P'op Hagä Do ër Yb, Jesus Kristo Tak'ëp Hyb N'aa Jawyk Do na-ããj hë ky en'yym bë hã. ãã karën baad bë rah'yyb en'yym.

Paw-Ro ratsebé Jesus hã rah'yy ka'eeh do hyb n'aa ky n'aa hahÿh

²P'op Hagä Do hã ãã ky n'aa etsëë bã, ãã tsebee had'yyt hë ta hã bë hyb n'aa. ³P'op Hagä Do ër Yb hã ãã ky n'aa etsëë bã, ãã hyb n'aa es'ee had'yyt hë baad bë babok doo, Jesus hã bë h'yy ka'eeh do hyb n'aa. ãã hyb n'aa esee tak'ëp bë moo heb'oooh bã bë da hadoo do bë masa hyb n'aa, bë kamahän do hyb n'aa sa hã. ãã hyb n'aa newëë na-ããj hë, baad nadoo do bë ahob né paawä, dooh né hë bë hyb n'aa eréd Jesus Kristo ër Wahë N'aa hã bë h'yy ka'eeh doo, p'aa hënh tabahyng bë bahapäh do hyb n'aa. Ti hyb n'aa P'op Hagä Do hã ãã tsebé. ⁴ãã wakään, P'op Hagä Do kamahän doo, ãã hapäh, bë P'op Hagä Do asëew hõm ta karapee bë bahadoo hyb n'aa. ⁵ãã wén hapäh tii, Jesus ky n'aa hanäm do bë ãã maher'oot noo gó, ãã kyy me had'yyt nado ãã baher'oot. P'op Hagä Do Sahee hejój banoo ãã hã, ãã bahajaa hyb n'aa ãã her'oot doo. Se hub né hë Jesus ky n'aa baad ãã bahapäh ãã h'yyb gó. Bë bahapäh nyy da ãã babok bë mahang. Baad ãã babok do hã bë bahapäh te hub né hë Jesus ky n'aa ãã manaa doo. ⁶ãã wén hapäh na-ããj hë bë P'op Hagä Do asëew hõm doo, ãã babok doo da, Tak'ëp Hyb N'aa Jawyk Do bawäd wät doo da bë baboo däg kån do hyb n'aa. P'op Hagä Do Sahee hana do ji tsebé doo me bë gado däk Jesus ky n'aa, ta wób bë rarahejã né paawä ta hyb n'aa. ⁷Ti hyb n'aa, sahõnh hë Masedonija häd näng do hãj n'aa bã, Akaja häd näng do hãj n'aa bã habong do Jesus hã h'yy ka'eeh doo, rahapëë däk hÿy kã tak'ëp P'op Hagä Do hã ji h'yy ka'eeh bë h'yy ka'eeh do hadoo. ⁸Bë hanaa né hë Jesus ky n'aa Masedonija, Akaja hãj n'aa bã raky n'aa napëë hõm doo. Jé pad'yyt hë raky n'aa napëë kån P'op Hagä Do hã bë h'yy ka'eeh doo. Ti hyb n'aa, dooh ãã her'ood wäd bã bë ky n'aa,

sahõnh hē raky n'aa napëë dāk do hyb n'aa P'op Hagä Do hā bē h'y'y ka'eeh doo. ⁹Sa daaj hē rabaher'ood kån jé pad'yyt hē bē hā ãã baher'ood wät doo, baad bē mahang ãã babok doo. Raher'ood kån na-ããj hē, bē eréd hõm kabarii hā bē h'y'y ka'eeh doo, P'op Hagä Do hā, hedëp do hā, heh'äät hā bē h'y'y ka'eeh hyb n'aa kã. P'op Hagä Do karën do bē moo bok hÿÿ kã, ta hā bē hyb n'aa jew'yyk hÿÿ kã, sa nooh. ¹⁰Raher'oot na-ããj hē ta T'aah, dejëp do mahang ganä wät do P'op Hagä Do an'oo bã, bē gada tamatëeh hÿ pong jé naa. Jesus bē gada, ji tamo n'aa jesuu doo, nesaa do hā ta hā h'y'y kana'eeh do P'op Hagä Do ky n'aa ety mahãnh.

Baad Tesaronika panang bã Paw-Ro rababok do ky n'aa hahÿÿh

2 Bëeh, ãã wakãän, bē hapäh ti dooh daap hē tado bã bē mahang ãã her'oot do Jesus ky n'aa. Hajõk ky dah'eeh. ²Pooj jé Pirip häd nãng do panang bã ãã rarejã né paawä, ãã raky n'aa rejã né paawä, P'op Hagä Do èr h'y'y kaha'eeh doo, ãã tah'yyb ne'ÿÿm. Ti hyb n'aa bē ãã maher'oot ta ky n'aa hanãm doo, hajõk bē panang buuj ãã rahyb n'aa wareem né paawä. ³Sahõnh hē sa hā ãã ky padäg hē Jesus hā rah'y'y ka'eeh hyb n'aa, dooh daap hē ãã menä bã. Ji es'õõs do nado tii. J'ooj madäk do nado ti ãã wén her'oot P'op Hagä Do ky n'aa. ãã karën do jawén nado. Dooh bē ãã wad'ii bã. ⁴ãã P'op Hagä Do metyy paah, ti ãã hā tah'yyb däng ta panyyg hanãm do ãã baher'oot hyb n'aa sahõnh hē sa hā. Ti hyb n'aa ta panyyg ãã baher'oot bã, dooh ta wób gen'aak do ky n'aa ãã her'ood bã. P'op Hagä Do gen'aak do ti ãã her'oot doo. Ti né hē ti ãã h'y'yb metyy doo. ⁵Dooh noo gó ãã h'y'yb manep'ëeh péh. Bē hapäh né hē, dooh tii da ãã adoo bã. Dooh noo gó ãã ky ken'yym sa ma hyb n'aa, Jesus ky n'aa ãã baher'oot bã. ãã ehub né hē ãã her'oot do P'op Hagä Do hapäh. ⁶Dooh ãã bē j'aa etsë do jawén ãã aboo bã. Dooh ãã ta wób raj'aa etsë do jawén ãã aboo bã.

⁷Kristo mejüü do ãã bahadoo do hyb n'aa, ãã karën bã paawä, ãã haja né paawä bē hā ãã mejõ bã. Ti hadoo né hē, dooh tii d' ãã karën bã. Bē mahang ãã babok noo gó baad ãã ky enyym bē hā. Ji ÿÿn ji takamahãn do hadoo, ⁸bē ãã kamahãn tak'ëp. Bē ãã panäk paa P'op Hagä Do panyyg hanãm doo. Baad ãã h'y'yb bē ãã masa hyb n'aa. Tii da ãã wén d'oo tak'ëp ãã kamahãn do hyb n'aa bëeh. ⁹ãã wakãän, bē hapäh nã tak'ëp ãã moo bok ãã ma, ãã waa sãm hā, bē mahang ãã habok noo gó. Adëb bã, atsëm ãã moo bok ãã waa sãm hā. Tii da ãã wén d'oo, bē hā ãã ganada hyb n'aa ãã waa,

ãã h'ëed, P'op Hagä Do panyyg hanäm do ãã her'ood nuuj jé bë hä. ¹⁰Bë hapäh, P'op Hagä Do hapäh na-ãäj hë hahÿÿh: Baad ub né hë, P'op Hagä Do karën doo da ãã babok paa bë mahang, Jesus hä h'yy ka'eeh do mahang. Dooh hyb n'aa ãã hä raky kes'ëem péh. ¹¹⁻¹²Bë hapäh na-ãäj hë, bä mahang ãã babok noo gó bë ãã h'yyb enäw had'yyt hë, bë ãã mejũũ tak'ëp péj sét ken'yyh, ji yb ji hä tabad'oo do hadoo, P'op Hagä Do karën doo da bë babok hyb n'aa. Tii da ãã karën bë babok, bë P'op Hagä Do atsyid wät do hyb n'aa tabag'ããs do karapee bë bahadoo hyb n'aa, ta sii, hÿ pong jé ta bag hetsooh do gabarëeh do mahang bë babok hyb n'aa.

¹³P'op Hagä Do ky n'aa bë hä ãã baher'oot noo gó, ãã kyyh nado ti bë hä. P'op Hagä Do kyyh bë hä, bë wén ky daheeh. Te hub né hë tii. P'op Hagä Do kyyh né hë ti bë maa newëe doo, ãã her'oot doo. Ta kyy me né hë P'op Hagä Do bë tah'yyb h'ÿÿt, bëeh, ta hä h'yy kasadä doo. Ti hyb n'aa P'op Hagä Do hä ãã tsebee had'yyt hë. ¹⁴Ãã wakãän, Jesus ky n'aa bë ky daheeh ãã wén hapäh, Judah häj n'aa bä habong do Jesus hä h'yy ka'eeh do hado däk do hyb n'aa bëeh. Jesus hyb n'aa bë wakãän bë rarahejãã, sa hä sa wakãän rarahejãã do hadoo Jesus hyb n'aa. P'op Hagä Do karapee, Kristo Jesus hä h'yy ka'eeh doo, Judah häj n'aa bä habong do rahoop sa wakãän mooh, Jesus hä rah'yy ka'eeh do hyb n'aa. Ti hadoo né hÿÿ kä bë ahoop né hë bë wakãän Jesus hä h'yy kana'eeh do sa mooh, P'op Hagä Do panyyg bë ky daheeh do hyb n'aa. ¹⁵Nanäng Judah buuj Jesus hä h'yy kana'eeh do kyy gó né hë radaj'ëep Jesus, Tak'ëp Hyb N'aa Jawyk Doo. Tii d' né paa sa wahë makü rabad'oo P'op Hagä Do ky n'aa rod wób sa hä. Radej'ëep né paah. Tii d' né hë ãã hä hÿÿ kä. ãã kejën bong ran'oo bä hajong panang bä. Dooh P'op Hagä Do gen'aak do ramoo boo bä. Sahõnh hë badäk hahÿÿ hä habong do majiĩ däg. ¹⁶Judah buuj nadoo do hä P'op Hagä Do panyyg hanäm do ãã baher'oot bä, P'op Hagä Do bed'ëep hyb n'aa sa h'yyb tym, ta wë rababok hyb n'aa, ãã rameduuk Judah buuj Jesus hä h'yy kana'eeh do hä. Tii d' had'yyt rawén d'oo do hyb n'aa ta bahãnh däg sa hä hanäng do nesaa doo. Ti hyb n'aa edaa däk ta säm baj sa hä P'op Hagä Do banoo doo.

Tak'ëp Paw-Ro rakarën rabaheg'ããs Tesaronika buuj ky n'aa hahÿÿh

¹⁷Ãã wakãän, banadawëd ãã bah'ũũm ran'oo bä bë mahãnh, tak'ëp ãã h'yy ketón bong, ji t'aah dajëp do ji h'yy katón do hyb n'aa hadoo. Dooh né paawä bë mahang ãã aboo boo bä, bë ãã hyb n'aa

esee. Tak'ëp āā karēn bē āā baheg'āās. ¹⁸Āā h'yyb gó āā karēn paawā bē āā bahehēēn. Hajōō nuu me hēp ȳy ȳ karēn paawā ȳ bahōm bē wē. Āā wén nahōm, Nesaa Do Yb āā tah'yyb panas'ēēh do hyb n'aa. ¹⁹Tak'ëp āā wén karēn bē āā baheg'āās, bē hyb n'aa né hē āā j'aa etsē, bē hyb n'aa né hē āā tsebé. Baad P'op Hagä Do hā bē h'yy ka'eēh nā Jesus matēēh noo gó āā gahēēn. Baad had'yyt hē Jesus hā bē h'yy ka'eēh do hyb n'aa āā tsebé da, āā j'aa etsē da Jesus Kristo, ēr wahē n'aa, p'aa hēnh tabahyng noo gó ji mo haj'aa tabaheg'āās bā. ²⁰Te hub né hē, bē hyb n'aa né hē āā kasab'ee, bē hyb n'aa né hē āā tsebé. Ti hyb n'aa āā karēn bē āā baheg'āās.

3 ¹⁻²Ti hyb n'aa, tak'ëp āā h'yy katón bā bē hyb n'aa, āā hyb n'aa newēē Tsimoot āā mejūū bē wē. Ti nuuj jé Atēn hād nāng do panang bā ȳ baym Siras daheeh. Āā h̄ȳj hadoo né hē ti Tsimoot. Āā moo hadoo né tii, P'op Hagä Do karēn do moo wāt doo. Kristo ky n'aa tahe'oot. Āā mejō hōm bē tah'yyb tsebé hyb n'aa, baad had'yyt hē Jesus hā bē h'yy ka'eēh hyb n'aa, ³bē h'yy ganejē hōm hyb n'aa, baad nadoo do bē ahoop do hyb n'aa. Bē hapāh né hē, Jesus Kristo hā ji h'yy kae bā, ji rarahejāā. Ti né hē P'op Hagä Do h'yyb dāng ji hā, baad ji h'yyb tawapēēn hyb n'aa. ⁴Bē mahang āā babok noo gó, hajōō nuu me bē āā maher'oot ji da rarejāā Jesus hā ji h'yy ka'eēh do hyb n'aa. Āā her'oot do paa ta ti bē hā, ta ti né ká. ⁵Bē h'yy geje hōm ȳ ed'oo bē rarahejāā do hyb n'aa. Nejaa wād hēp ȳy ȳ gamada me bē ky n'aa. Ti hyb n'aa ȳ mejūū Tsimoot bē wē, bē taheg'āās Jesus hā bē h'yy kae nā bā. Ȳ h'yyb ēȳm Nesaa Do Yb, ji h'yyb tahet'uuk doo, bē tah'yyb tatug bā bē hyb n'aa eréd hōm bā Jesus. Ȳ h'yyb ēȳm Satanás bē tah'yyb met'ēēg hōm bā. Daap paawā tii bā āā ma met'ēēg bong Jesus ky n'aa bē hā.

⁶H̄ȳ ká, nag'aap hē Tsimoot kaja nā bē wē hana doo. Baad bē ky n'aa tabahe'oot. Baad Jesus hā bē h'yy ka'eēh tanooh, baad ta wób bē kamahān tanooh. Bē hyb n'aa es'ee had'yyt hē m' āāh, tanooh. Tak'ëp mā bē karēn bē wē āā baheg'āās, tanooh. Tii d' né āā karēn né hē. ⁷Ti hyb n'aa, āā wakāān, tak'ëp āā rarahejā né paawā āā tseebe kán bē ky n'aa hanām do hyb n'aa. Jesus hā bē h'yy ka'eēh nā do hyb n'aa āā wén tsebé. ⁸H̄ȳ ká dooh āā h'yy ketón boo bā. Āā tseb'ee h̄ȳ ká, baad Jesus hā bē h'yy kae had'yyt do hyb n'aa. ⁹“Taw'āāts hē ōm ee. Baad mah'yyb mahūūm sa h'yyb tym. Āā mah'yyb tym tseb'ee sa hyb n'aa”, nāk āā P'op Hagä Do hā. Tak'ëp P'op Hagä Do āā j'aa etsē bē hyb n'aa. ¹⁰Hajōō nuu me tak'ëp P'op Hagä Do hā āā betsēē, p'aa hēnh bē āā baheg'āās tan'oo

bä, bë äã ma metëek hyb n'aa bë nahapäh nä doo, baad had'yyt hë Jesus hä bë h'yy ka'eeh hyb n'aa kä.

¹¹ P'op Hagä Do er Yb hä, Jesus er Wahë N'aa hä na-ääj hë äã ky n'aa etsëe, rabado hõm hyb n'aa sahõnh hë äã tahewaat doo, tabahajaa hyb n'aa bë wë äã bah'üüm. ¹² Tak'ëp Hyb N'aa Jawyk Do hä äã ky n'aa etsëe, sahõnh hë bë da hadoo do tak'ëp bë kamahän magyys hë hyb n'aa, tak'ëp bë äã kamahän doo da. ¹³ Äã ky n'aa etsëe bë h'yyb tym tabehej'oonh hyb n'aa, ta karapee sii hë Jesus er Wahë N'aa kajaa bä kä, ji naw'yyt hyb n'aa bë hä raky n'aa tapaa do ky n'aa P'op Hagä Do er Yb matym gó, baad ub, tsyt hë ta wë bë babok do hyb n'aa.

P'op Hagä Do karën doo da ji bawäd had'yyt hë do ky n'aa hahÿÿh

4 Hÿÿ kä äã wakään, ta see ky n'aa bë hä äã ma erih. Jesus kyy gó tak'ëp äã betsëe paa bë hä, P'op Hagä Do karën doo da bë baboo had'yyt hë, bë äã ma metëek do paa hadoo da. Tii d' né hë bë babok äã hapäh. Hÿÿ kä, ta bahänh äã karën bë an'oo bä. ² Tii d' ÿ wén etsëe bë hä, bë hapäh do hyb n'aa Jesus ky gabuuj gó bë hä äã mejüü do paa.

³ P'op Hagä Do karën sahõnh hë baad nadoo do bë eréd hõm, baad hadoo do bë gadoo, baad had'yyt hë bë babok hyb n'aa kä. Dooh P'op Hagä Do karën bä bë äã bä bë ÿÿm, bë patug nadoo do sii. ⁴ Takarën bë sahõnh hë bë h'yy keb'aah bë ÿÿm nadoo do hä, bë patug nadoo do hä. P'op Hagä Do karën baad ub, tsyt hë, ta wë bë baboo had'yyt hë, P'op Hagä Do hä, ta wób hä na-ääj hë weh'ëeh doo da. ⁵ P'op Hagä Do sa h'yyb gó nahapäh do bë hado manäh. Nesaa do sa h'yyb tii. Rah'yy karën pé sii rabahe'ÿÿh. ⁶ Dooh ta tii da ji wad'ii ji da hadoo doo. Ta da hadoo wadii péh, ta da hadoo do ÿÿm sii haÿÿh péh, Tak'ëp Hyb N'aa Jawyk Do rajää da, baad äã maher'oot do paa né hë bë hä. ⁷ Er P'op Hagä Do atsyid wät, baad had'yyt hë er babok hyb n'aa ta wë. Dooh er tatsyid bä nesaa doo gó er babok hyb n'aa. ⁸ Ti hyb n'aa jé hahÿÿ äã ma metëek do taky nadahé bä, aj'yy kyyh had'yyt hë nado taky nadaheeh, P'op Hagä Do kyyh ti taky nadaheeh doo! P'op Hagä Doo, ta Sahee baad had'op do bë hä hanoo do ti taky nadaheeh!

⁹ Dooh hyb n'aa bë äã ma erih pé ji da hadoo do ji kamahän do ky n'aa, P'op Hagä Do ma met'ëeg wät do hyb n'aa bëeh, bë kamahän hyb n'aa bë da hadoo doo. ¹⁰ Äã hapäh, sahõnh hë Jesus hä h'yy ka'eeh do Masedonija häj n'aa bä habong do bë kamahän.

Ti hado né paawä, ää wakään, tak'ëp ää betsëe bë hä ta bahãnh bë kamahãn hyb n'aa bë da hadoo doo. ¹¹ Ta äh hä had'yyt hë bë hyb n'aa newë nyy da bë bad'oo, tak'ëp baad ub bë babok hyb n'aa bë da hadoo do wë, bë du nen'aa hyb n'aa bë tah. Taw'ääts hë bë ma hä bë moo bok, bë waa enäh hyb n'aa, bë h'ëed enäh hyb n'aa, bë ää ma metëek do paa da né hë ää habok noo gó bë mahang. Taw'ääts hë ta tii hä bë h'yyb padäg had'yyt hë. ¹² Tii da bë ää wén mejũũ, ta äh hä had'yyt hë baad bë babok Jesus hä h'yy kana'eeh do rahegãä bä kä, baad bë raweh'ëeh hyb n'aa, ta wób hä bë daab yb mahãnh n'aa na-ääj hë.

Jesus matëeh do ky n'aa hahÿÿh

¹³ Ää wakään, ää karën baad bë bahapäh Jesus hä h'yy ka'eeh do dejëp do sa ky n'aa. Dooch ää karën bë h'yy ketón bä dejëp do hä, ta wób, Jesus hä h'yy kana'eeh do rah'yy katón doo da. Tak'ëp rawén h'yy ketón tii, rapanyyg kanadaheeh do hyb n'aa ji ganä wät do ky n'aa. Ji dajëp jawén paa bä, dooh baad hadoo do ragahëen péh. ¹⁴ Jesus dajëp, tii bä taganä wät p'aa hënh ää hapäh. Ti hyb n'aa ër hapäh hahÿÿh: Jesus hä h'yy ka'eeh do paa dejëp doo, genä bong da p'aa hënh sa kamag paa P'op Hagä Do an'oo bä. Hÿ pong jé Jesus masäk ta sii P'op Hagä Do an'oo bä. ¹⁵ Bë ää maher'oot Jesus, Tak'ëp Hyb N'aa Jawyk Do ää tama metëek doo: Èër, babä hedëp nä do Jesus p'aa hënh tamatëeh bä, dooh da ër mamuun ta hä, ta hä h'yy ka'eeh do dejëp do sa pooj jé. ¹⁶ Ta daaj hë Tak'ëp Hyb N'aa Jawyk Do bahyng da wawëe hë hÿ pong jé naa. Ti noo gó da ji maa napäh da ta hejój Jesus mejũũ doo. Tak'ëp da ta kyyh. Ti noo gó né da ji maa napäh ääs sa wahë n'aa kyyh. Ti noo gó né da toröm-bet häd näng doo, P'op Hagä Do ma, gamehÿÿh do ji maa napäh da. Tii bä kä, Kristo hä h'yy ka'eeh do dejëp do paa kä genä hõm kãn sa kamag paah. ¹⁷ Tii bä nadejëp nä doo, as'ëeg kãn sa sii wë puh mahang P'op Hagä Do an'oo bä, wë hä, Jesus ër wahë n'aa, ër gadoo hyb n'aa. Tii bä kä, hÿ pong jé ta sii had'yyt ër baboo kãn. ¹⁸ Ti hyb n'aa bë da hadoo do hä bë h'yyb tseebe ji ganä wät do ky n'aa hä.

5 Dooch hyb n'aa ny noo gó Jesus bahyng do ky n'aa ää berih péh, ää wakään. ² Baad bë bahapëe däk ta ti ky n'aa. Bë hapäh, nyyw hë da Jesus kajaa. Ji ganada bä takajaa. Hets'ëek do atsëm kajaa do ji ganada do hadoo tii. ³ Ta wób, Jesus hä h'yy kana'eeh do rah'yy kanap'eed gó raky hadoo bä: “Taw'ääts hë, h'yyb nyyw

däk badäk hahỹỹ hã habong doo. Dooh ër heỹỹm péh”, rabanäng bä, tii bä kä da, nayyw hẽ P'op Hagä Do mo haj'aa adäng sa hã tak'ëp nesaa doo. Nayyw hẽ da tii. Yỹnh wog mahỹỹnh nayyw hẽ ganä däk do hadoo da. Nayyw hẽ da P'op Hagä Do mo haj'aa adäng sa hã tak'ëp nesaa doo. Dooh da rahaja bä rakejën bä ta ti mahãnh.

⁴Jesus hã h'yy kana'eeh doo, badagyp do hadoo doo gó habok doo, Jesus kajaa do ganah'ëen do nahado bëeh. Ti hyb n'aa dooh bë h'yy gabadoo bä Jesus kajaa do hã, hets'ëek do hã ji h'yy gabadoh do hadoo. ⁵Ta bag hadoo doo gó habok do bëeh, P'op Hagä Do panyyg hanäm do hã bë h'yy kadaw'uuh do hyb n'aa. Ti hyb n'aa dooh bë h'yy gabadoo bä Jesus kajaa bä. Atsëm habong doo, P'op Hagä Do panyyg hanäm do hã h'yy kanadew'uuh do hyb n'aa badagyp do hadoo doo gó habong do nahado ëer. ⁶Ti hyb n'aa taw'ãäts hẽ dooh ji h'yy kanap'eed bä Jesus kajaa do hã ta wób rabad'oo doo da. A'ỹyh do hadoo tii. Taw'ãäts hẽ ër hyb n'aa matakëë. Taw'ãäts hẽ ër h'yyb ër mesoo, baad nadoo do ji h'yyb karën do jawén ër nabok hyb n'aa. ⁷Ha'ỹyh doo, atsëm ti rabaỹyh. Jarakë hedoo do he'ëek doo, atsëm ti rakanahapëë bong ta mahỹỹj hyb n'aa. Atsëm buuj hadoo né tii, badagyp do hadoo doo gó habok doo. ⁸Ëër, dooh tii da ër hado bä. Adëb bä buuj hadoo ëer, baad hadoo do P'op Hagä Do karën do hapäh doo. Ti hyb n'aa, taw'ãäts hẽ ër h'yyb ër mesoo, baad nadoo do ji h'yyb karën do jawén ër nabok hyb n'aa. Taw'ãäts hẽ baad ër kan'yyh, sa h'yy gatsapoog me, sa nu gasu me na-ãäj hẽ warahén rakan'yyh doo da hadoo. Hahỹỹ d' ỹ hanäng pé tii: Taw'ãäts hẽ baad ër h'yy kae had'yyt hẽ P'op Hagä Do hã. Taw'ãäts hẽ ta wób ër kamahãn had'yyt hẽ. Taw'ãäts hẽ Jesus ër ted'ëep sahõnh hẽ P'op Hagä Do rejãã do mahãnh ër gahëen had'yyt hẽ.^a

⁹Ta ti ỹ wén her'oot, ër P'op Hagä Do asëew hõm ër tarejãã hyb n'aa nado. Ër tasëew hõm ër tabed'ëep hyb n'aa ta wób tarejãã noo gó, ër hyb n'aa Jesus Kristo ër Wahë N'aa, dajëp do hyb n'aa. ¹⁰Ër hyb n'aa Jesus wén dajëp, ta sii ër babok hyb n'aa. Jesus matëeh bä ër edëb nä bä, ër dejëb bä na-ãäj hẽ, ta sii né da ër babok. ¹¹Ti hyb n'aa, P'op Hagä Do ër ted'ëep do hyb n'aa, bë da hadoo do hã bë h'yyb tsebee. Bë da hadoo do hã bë h'yyb masaa. Tii da bë bad'oo doo da né hỹỹ kä.

^a 5.8 Tii d' ji adoo bä, dooh da nesaa do ji moo wäd bä.

¹²Ãã wakããn, tak'ëp ãã betseẽ bë hã, bë wehëë bë mahang tak'ëp moo bok doo, bë da h'yyb hadoo do Jesus hã h'yy ka'eeh do bë ma met'ëëk doo, bë h'yyb mah'ũũm doo. ¹³Bë wehëë, bë kamahãn, tak'ëp ramoo bok do hyb n'aa bë ramasa hyb n'aa. H'yyb nãm doo gó bë aboo bë da hadoo do wë.

¹⁴Ãã wakããn, tak'ëp ãã betseẽ bë hã, tak'ëp peej bë maher'ood Jesus hã h'yy ka'eeh do moo nehõnh do ramoo bok hyb n'aa sa ma sãm hã, sa waa sãm hã. Bë h'yyb tsebee jé h'yyb nahed'oo doo. Bë masaa kanahën doo nä Jesus hã h'yy ka'eeh doo. Bë hyb n'aa ejãg manäh bë da hadoo do hã. ¹⁵Bë abaaj manä nesaa do bë wë moo wät do hã. Taw'ãäts hë bë ky enyym bë da hadoo wë, ta wób, Jesus hã h'yy kana'eeh do sa wë na-ãäj né hë.

¹⁶Taw'ãäts hë bë h'yyb tsebee had'yyt hë. ¹⁷Taw'ãäts hë bë ky n'aa ets'ëë had'yyt hë. ¹⁸Taw'ãäts hë P'op Hagä Do wë bë tsebee had'yyt hë, baad tabadoo bä bë hã, baad tanado bä bë hã na-ãäj hë. Tii d' né hë P'op Hagä Do karën bë hã, Kristo Jesus karapee, Jesus ky dah'eeh do bë bahadoo do hyb n'aa.

¹⁹Bë medug manä P'op Hagä Do Sahee. ²⁰Bë ty n'aa gesygy manä bë ramaher'oot doo, P'op Hagä Do Sahee metëeh do rahanäng doo. ²¹Ti hadoo né hë, bë mety sahõnh hë raheer'oot doo, P'op Hagä Do Sahee hanaa né hë tado bä bë bahapäh hyb n'aa. Tii bä bë gadoo te hub hadoo doo. ²²Taw'ãäts hë nadoo doo, P'op Hagä Do kyy kerih do hã baad kanejäk doo, bë gado manäh. P'op Hagä Do Sahee kyy gó nado tii bä.

²³P'op Hagä Do hã, ta karapee tah'yyb n'yyym doo, ÿ ky n'aa etsëë tsyt hë baad had'yyt hë, takarën doo da bë babok tan'oo bä. ÿ ky n'aa etsëë, tabanoo hyb n'aa bëeh, bë h'yyb tym sii hë, baad tabahadoo hyb n'aa Jesus Kristo ër Wahë N'aa matëeh bä kä, ji naw'yyt hyb n'aa bë hã raky n'aa tapaa do ky n'aa. ²⁴P'op Hagä Do bë tanaëënh doo, dooh tah'yy gajëë hõm bä ji hã. Tahajaa né hë ta hã ji h'yy kasadëë bä. Ti hyb n'aa ÿ hapäh baad ub, tamoo wät né hë ta hã ÿ etsëë doo.

Paw-Ro rakedëë bong do ky n'aa hahÿyh

²⁵Ãã wakããn hedoo doo, bë ky n'aa ets'ëë P'op Hagä Do hã ããh. ²⁶Ãã karën baad bë edëë ãã kyy gó sahõnh hë Jesus hã h'yy ka'eeh doo. ²⁷Jesus ky gabuuj gó ÿ betseẽ bë hã, bë ner'oot hyb n'aa hahÿ ãã ma erih do sahõnh hë Jesus hã h'yy ka'eeh do sa hã. ²⁸Tagadëëg ub ãã karën, Jesus Kristo, ër Wahë N'aa ky enyym bë hã. Jããm hë kä.